

同治辛未重刊

產孕集

板藏福省後街宮  
巷口吳玉田刻鋪

序

產孕集者張子輯醫經方書之言產孕者爲書蓋產寶諸方之流以豫民用者也張子少工醫名藉甚世多傳其書而余反復讀之竊有以見其用意之至非醫家者流所能及其言產孕非醫之事難產多自致之因推產孕生化之由生人美惡之故而歸其原於胎教旨深哉而難者或謂文母胎教目不視惡色耳不聽淫聲口不道惡言此聖賢克己復禮之事非可望之婦人女子然余嘗考之禮徵之詩竊見周宮內史之所掌曲禮內則之所陳關雎葛覃采蘋之所詠酒食絢組以勞其體珩璜容臭以飭其度進退有其儀起居有其節凡所以範其心志養其性情閑其物欲者委曲煩瑣必周必詳

豈有惡色之可視淫聲之可聽惡言之可道哉物欲絕而性情和性情和而心志一清明在躬疾疢不作烏有所謂難產者哉詩人之美姜嫄曰先生如達不坼不副無災無害列女傳稱文母曰溲於豕牢而得文王言生理之順皆以著母德之純由是以觀古未嘗別有所謂胎教者也禮而已矣後世禮教寢衰門內尤畧而不究至於燕私隱曲之地任情率意以爲固然於是性情日舛心志日佚喜怒失其度動止變其節和氣漸乖災害並至產孕之患特其一端識者慨女德之敝思古賢母之所以盡禮者推原其事因著胎教之說思以兒女之愛引其復禮之思而移其失禮之俗顧能爲胎教者必能明禮則之人然則今亦無所謂胎教也禮而已矣又嘗

讀詩而知則百斯男原於太姒之不嫉妬哀窈窕思賢才至  
於寤寐反側當時嬪御世婦類皆淑女故能相與以致其和  
而成螽斯之慶於是化行南國女子皆能以禮自守而和樂  
其室家芣苢江漢諸篇可謂極一時禮教之盛矣且夫周南  
召南皆宮壺之庸德耳宜非后夫人所欲自彰而當時化行  
列邦後世著爲風始周先王刑于之化反隱而不言而獨著  
后夫人之事豈不以禮始於夫婦而事達於國家禍福之所  
自生治亂之所由兆其事近而易忽其機疾而莫挽著一代  
之盛爲百世之鑒也乎然則謂先王之禮未可責之婦人女  
子者非知言也雖然使太姒之賢而非文王之聖則太姒以  
爲賢者文王未必以爲賢雖有逮下之恩保無凌上之咎化



何由成然則禮教之盛衰誠未可僅責諸婦人女子也耶余  
恐世有迂張子之言者因推其旨而以余所聞者證之若夫  
醫理之精方藥之美世多知者亦非余所知恐亦非張子命  
意之所注也道光乙巳三月同里章岳鎮

產孕集目錄序

辨孕第一 養孕第二 孕宜第三 孕忌第四 孕疾弟  
五 辨產第六 產戒第七 用藥第八 應變第九 調  
攝第十 懷嬰第十一 拯危第十二 去疾第十三

凡十三篇爲上下二卷敘曰產孕者天地之大化生人之本始而難產之患自古有之左傳莊公寤生驚姜氏寤生卽逆產也然古者持胎教寡嗜欲生理順而難產少故生民之詩曰誕彌厥月先生如達不圻不副無災無害列女傳述文母之胎教終之曰洩於豕牢而得文王言生之易也後世不知胎教務自縱恣生理旣逆難產實繁於是設方法以治之處湯液以救之而方藥愈備難產益眾遂有婦媪羣起妄造謬

法剖胎出嬰使無知之赤子無罪之婦人櫻屠磔之刑罹鋒刃之慘生人之禍莫此爲甚夫人命至重也父子至愛也而戕賊生命剝剔人子旁觀不以爲非主者不以爲怨何哉醫無救之之術不能不望救於婦媪假令扁倉在左婦媪在右則雖至愚必知所擇故婦媪之殺人醫者之過也雖然產孕之事非醫事也難產之患皆自致之非本然也故欲湯之滄而揚之不如勿燭也欲絃之固而續之不如勿斷也欲難產之安而藥之不如勿致也不揣其本而齊其末不絕於彼而救於此良吏勿能爲治良醫勿能爲功然則欲治難產先理胎教欲理胎教先明禮則禮教隳廢內儀不修晏私暱於帑帷勤惰愆於厥職以苟適爲便以傲恣爲高蓋自縉紳浸於

編戶女德日做難產日多競哀其末莫知其本君子之道造  
端乎夫婦記言其不信矣夫歲在己丑家君宰館陶余隨侍  
官廨民有疾苦踵門求治輒爲除之而難產之患同於江左  
有婦逆生醫者莫救太孺人聞之命褻藥遣僕馳往治之至  
則死已竟日以貧故未收毫姑幼子號泣於室強飲之藥旋  
卽蘇活又巨室張氏婦孕五月動而漏下醫不知治十日而  
隕血注不止因而暈絕余聞藥之蘇又治百日乃瘳其他慘  
酷大都相類由此觀之無辜而死者蓋多已夫殺卵殀夭先  
王所禁况在人類體仁利物儒者之事况在斯民用是考核  
原委該約大指著爲此書冀以絕其流弊豫其常變窮理之  
士或無誚焉道光庚寅冬十二月陽湖張曜孫

... 十二月... 吳玉田鑄字

吳玉田鑄字

產孕集上篇

陽湖張曜孫箸

吳縣潘希甫校

辨孕第一

二氣相感合而生神。兩精相搏聚而成形。陽奇而施陰偶。而承陽施而靜。陰承而動。靜則陽凝動則陰攝。動靜互根。形神交倚而孕。以成。易曰。天地絪縕。萬物化醇。男女構精。萬物化生。故乾坤消息而變。萬類日月運行而生。寒暑鳥獸草木昆蟲鱗介之屬。莫不附陰化陽。因氣成質。其生雖不同。而所以生者一也。人爲萬物之靈。得天地之正。具五德之全。經緯蕃變。與上下參。男稟陽得乾道。女稟陰得坤道。乾主動而生靜。

坤主靜而生動。乾動則陽施。坤靜則陰承。陽生靜則氣化而  
神生。陰生動則精融而形成神。裕其始而形要其終。故孕者  
始于神而終于形。生于陽而成於陰也。凡物生易而成難。未  
孕之先。兩氣相感如磁引鍼。如珀黏芥。適然而合。其動以天  
非陰陽離決。氣憊精涸者。鮮不凝合。自然生化。絕無人功。既  
孕之後。積氣成形。分別百體。營建藏府。條理絡脈。灌溉筋骨。  
閱三百餘日。乃成爲人。日滋月遂。盡取給于母氣。苟失其道。  
或生而不育。形體不具。氣血薄弱。壽命夭折。譬之果實之屬。  
風雪侵之。非立見萎落。卽不適于口。故未孕之先。無俟人力。  
既孕之後。半由人功。攝養以安之。藥物以助之。調其陰陽。以  
煦之。絕其賊害。以固之。祛其疾痛。以衛之。皆人力之所爲也。

古者婦人別立治法以有月事產孕之異而產孕尤重蓋產  
孕者生人之始而保護又產孕之始也患者不察或誤孕爲  
疾而肆其攻擊或誤疾爲孕而養虎貽患小則傷體大則傷  
生深可憫焉辨孕之法素問曰陰搏陽別謂之有子又曰足  
少陰脈動甚者姪子也脈經曰脈滑疾而重按之散者胎已  
三月脈重按之不散但疾不滑者五月也又曰三部浮沉正  
等按之無絕者姪也千金方論曰脈平而虛者乳子法也手  
少陰脈動甚者姪子也尺中之脈按之不絕者法妊娠也諸  
家論脈其說不一要不外滑利和平不偏不弊所謂身有病  
而無病脈身無病而有病脈爲簡而易明經閉吐逆體怠惡  
食而脈反平和是有病而無病脈也外無吐逆諸病體旺如



昔而脈反滑利動疾。是無病而有病脈也。脈象微妙驟不易知。差之毫釐。謬以千里。善診者心領神會。毋事固執。斯爲善也。懷妊之候。必病惡阻。苦沈重。憤悶不欲飲食。又不知患所在。頭重眩暈。四肢惰懈。不欲執作。喜噉酸醎果實。多臥少起。氣逆嘔吐。蓋由經血既閉。水漬於藏。藏氣不宣。血脈不行。故有此候。察其候合其脈。孕之是非無所遁矣。若兼有表裏諸疾。脈不可辨。則別有驗之之法。以雀腦芎藭一兩。當歸七錢爲末。分二服。煮艾湯或醇酒下之。二三時間覺腹中臍間微動。卽爲有孕。或以醋煮艾湯半盞服之。有孕必大痛。無孕則否。妊娠四月。男女可分。脈法左疾爲男。右疾爲女。左右俱疾爲產二子。左手沈實爲男。右手浮大爲女。左右俱沈實。生二

男左右俱浮大生二女左尺偏大爲男右尺偏大爲女左右尺俱大爲產二子又法左尺中浮大者男右尺中沈細者女若脈不可知則有辨法人按其腹如覆盃者男也如肘項參差起者女也左乳房有核者男也右乳房有核者女也孕婦行坐自後急呼之左迴首者男右迴首者女蓋左右者陰陽之道路也陽親其左陰親其右自然投託各就其所氣血因之故脈象應之盛於左則左疾而太盛於右則右疾而太其有異孕無所歸屬則兩者皆見尺中者腎部也腎主胞門孕之所在陽具於左故浮太陰具於右故沈細也男形常伏女形常仰故揣腹可知乳爲陰府下通胞門陰盛則結各就其位氣血偏盛則身有偏重視其迴首可知者必慎護其重

也千金方又言男子左乳房結核者生男右乳房結核者生女婦有孕而驗其夫原其所始理亦可通而所以結核之故終不可解矣

養孕第二

妊娠一月名始胎。足厥陰脈養之。其經內屬於肝。肝主筋。及血是時。血行否澁。毋爲力事。必令安靜。嗜酸醎。食宜麥。毋食腥辛。若曾孕一月而墮者。宜預服補胎湯以養之。

補胎湯 乾地黃 一兩 白朮 一兩 生薑 一兩 防風 六錢 大麥

二合 烏梅 三合 細辛 三錢 吳茱萸 一合 八味以水三升煮

一升分三服 熱而渴者去吳茱萸 細辛加栝萸根 三錢

見千金方

二月名始膏。足少陽脈養之。其經內屬於膽。主精。是時精成於胞。裏若曾孕二月而墮者。宜預服黃連湯以養之。

黃連湯 黃連 三錢 人參 三錢 吳茱萸 一合 五勺 生薑 一兩

生地黃一兩六錢

共五味以水三升煮一升分四服日一

若覺不安加烏梅三合

見千金方

三月名始胞未有定儀見物而化手心主脈養之其經內屬於心當靜謐以定心氣食穀宜稻羹宜魚若曾孕三月而墮者宜預服茯神湯以養之

茯神湯茯神丹參龍骨各三錢

阿膠當歸甘草人參各一

兩大棗二十一枚

赤小豆二十一枚

九味水三升煮一升

分四服七日後更作腰痛者加桑寄生六錢

見千金方

四月始受水精以成血脈手少陽脈養之其經內輸於三焦是時形體已具當盛其血氣以通耳目而行經絡若曾孕四月而墮者宜預服菊花湯以養之

菊花湯菊花如雞子大一把 麥門冬三合 大棗十二枚 人

參五錢 當歸甘草各六錢 阿膠一兩 生薑一兩六錢 八味

以水三升煮半內清酒一升并膠煎取一升分二服若受寒者加麻黃見千金方

五月始受火精以成其氣足太陰脈養之其經內屬於脾是時四支皆成宜適飢飽其食宜甘羹宜牛羊和以茱萸養氣以定五藏若曾孕五月而墮者宜預服安中湯以養之

安中湯黃芩三錢 當歸芍藥乾地黄人參各六錢 甘草芍

藥各一兩 生薑二兩 麥門冬三合 五味子一合五勺 大棗

三十五枚 十二味以水二升三合清酒一升五合煮取一

升分四服日三夜一七日後更作 見千金方

六月始受金精以成其筋足陽明脈養之其經內屬於胃主口目是時口目皆成身欲微勞以變腠理紉筋以養其力以堅背脊若曾孕六月而墮者宜預服麥門冬湯以養之

麥門冬湯麥門冬

三合

人參甘草黃芩各

六錢

乾地黃一

兩阿膠

一兩三錢

生薑

二兩

大棗

十五枚

八味以水二升

三合煮減半內清酒六合并膠煎一升分三服中間進糜粥 見千金方

七月始受木精以成其骨手太陰脈養之其經內屬於肺主皮毛是時皮毛已成宜勞身動作以運血氣食穀宜粳稻避寒就燥以密腠理以養骨而堅齒若曾孕七月而墮者宜預服葱白湯以養之

葱白湯葱白長二寸者十四莖麥冬三合旋覆花六勺黃

芩三錢人參五錢甘草當歸黃耆各一兩阿膠一兩三錢

生薑二兩六錢十味水二升六合煮減半內清酒一升及

膠煎一升餘分四服白一服溫進見千金方

八月始受土精以成膚革手陽明脈養之其經內屬於大腸

主九竅是時九竅皆成無使氣極以密腠理而澤顏色若曾

孕八月而墮者宜預服芍藥湯以養之

芍藥湯芍藥一兩三錢生薑一兩三錢厚朴六錢甘草當

歸白朮人參各一兩薤白三合八味以水一升六合酒一

升煮一升分三服日一見千金方

九月始受石精六府百節莫不畢具足少陰脈養之其經內



屬於腎腎主續縷是時經脈續縷皆成穀氣入胃毋犯冷濕  
飲宜醴食宜黍緩帶自持以養毛髮致才力若曾孕九月而  
墮者宜預服猪腎湯以養之

猪腎湯猪腎

一具

茯苓桑寄生乾薑乾地黃芎藭各

一兩

白朮

一兩三錢

附子

三錢

大豆

一合

麥門冬 三合 十味以

水三升煮腎令熟去腎納諸藥煎取一升分三服日一

見千金方

十月足太陽脈養之其經內屬於膀胱五藏完備六腑齊通  
納天地氣於丹田使關節人神皆備待時而出宜服滑藥以  
速其生

以上本徐之才說

若曾孕十月而不產者宜預服八物湯

八物湯人參

三錢

白朮

三錢

茯苓

三錢

甘草

一錢 陳皮

錢  
芎藭 一錢五分  
當歸 三錢  
熟地黃 三錢  
白芍 一錢五分

共作一服以水一升煮四合日一服 見萬病回春

凡孕十月三陰三陽各養三十日內輸五精外受五氣惟手少陰太陽不養心爲君主統攝百脈下主月水上爲乳汁手太陽合之故不專養天氣盛於東南地氣盛於西北故萬物之生始於東南而成於西北養孕之脈始於足厥陰東方木生氣之原也繼之以手心主南方火長氣育之也繼之以足太陰陽明中央土化氣宣之也繼之以手太陰陽明西方金收氣堅之也繼之以足少陰太陽北方水藏氣成之也天一生水故始受水精土載萬物故終受土精氣以順養精以逆受相生無不及相剋無太過猶之四時遞嬗自春而夏而長

夏而秋而冬而一歲成。五氣互生。自木而火而土而金而水。而一人成。其理一也。孕之生也。陰陽相合。氣含陰陽。則有清濁。清者浮升而善動。濁者沈濁而善靜。動靜相交。陽中之陰沈而下。降陰中之陽浮而上升。陽之升也。自東而南。陰之降也。自西而北。陽升於東。則魂具而化神。陰降於西。則魄藏而凝精神。化則氣生。精凝則質結。故孕一月如露珠。太極也。陰陽之未判者也。二月如花蕊。太極生兩儀也。陽升陰降。陰陽之已分者也。三月至五月。形體具而四支成。陽自東而南。陰自西而北。五神既宅。四維乃張。兩儀生四象也。六月以後。筋骨皮毛。九竅百節。無不畢具。陰陽交育。精氣旋生。四象生八卦也。八卦生而天道備。十月盡而人道具。所謂萬物一太極。

一物一太極也。知孕之所以生，則知所以養之之道矣。凡孕三月體虛者，宜常服滋生湯。

滋生湯：熟地黃三錢、白芍、甘草、芎藭、當歸、阿膠各一錢、黃

芩六分、砂仁一錢、糯米百粒。

或參朮養胎飲。

參朮養胎飲：人參一錢、白朮三錢、茯苓二錢、炙甘草八分。

歸身、白芍各一錢五分、阿膠二錢、陳皮八分。

體過實者，宜金匱當歸散。

金匱當歸散：當歸、川芎、藜蘆、黃芩、白朮、白芍各一兩，治爲末。

每服一錢，百沸湯調下。見丹溪心法。

挾寒者，宜減味保胎丸。

減味保胎丸。白朮、熟地、阿膠各二兩。當歸、杜仲各一兩五

錢。川斷、川芎、窮各一兩。艾五錢。八味、搗末、杵棗爲丸。每服

五十九丸。

挾熱者宜黃芩散。

黃芩散。黃芩一錢。搗末濃煎白朮湯調下。日一。見丹溪

心法。

或芩朮湯。

芩朮湯。黃芩三錢。白朮一錢五分。二味作一服。見丹溪

心法。

或白朮丸。

卽前方十倍爲丸。如桐子大。日三十丸。見丹溪心法。

將產體實而旺者宜達生散以速之。

達生散大腹皮 二錢 甘草 一錢五分 當歸白朮白芍各 一

錢 人參陳皮紫蘇枳殼砂仁各 五分 青葱 五寸 十一味作

一劑孕九月後服之日一服體旺者至產而止 見丹溪

### 心法

凡孕無論虛實皆宜服便產方三四月後三十日服一劑八  
九月二十日服一劑將產之月日一服之是方制合精良無  
可增減俗傳謂宮中十二味係明嘉靖間太醫所作如法服  
之絕無難產之患眞良方也。

便產方當歸 一錢五分 芎藭 一錢三分 厚朴 七分 枳殼

炒 六分 兔絲子 二錢 艾葉羌活各 五分 貝母 一錢 荆芥 八分

黃芪

七分  
蜜炙

白芍

一錢二分  
炒

甘草

五分

水煎隨宜服之

見

保產輯要

孕宜第三

人有清濁厚薄之異。智愚善惡之殊。揆其所始。皆由祖氣。祖氣者。先天之氣也。氣清則善。氣濁則惡。清則聖哲。濁則昏愚。然而凶頑之質。亦生。聖人賢哲之嗣。或多昏昧。何也。是豈祖氣之有所變易乎。蓋生成有消息之理。長養寓補救之方也。凡物陽生而陰成。生人之初。稟氣於父。兩氣既合。胚胎以凝。自此以往。日滋月遂。至於成人。皆由母氣。蘊爲五神。發爲五氣。育爲五精。結爲五藏。開爲五官。氣以煦之。血以濡之。得其道。則氣厚而神清。失其道。則氣濁而神昏。清則可以反濁。濁則可以害清。自然之理也。譬之稼穡。良莠不同。由於種之美惡。然使土瘠。氣薄。暘雨不時。灌溉失度。則雖美種。不如萑稊。



土沃氣厚燥濕均平種雖不良亦必大熟故祖氣者稼穡之種也母氣者土氣也氣煦血濡者暘雨也攝養之道灌溉之力也稼穡不能專恃天時因有灌溉之法生人不能專恃父氣必有補救之方調之使均攝之使平反昧爲哲易濁爲清精微之道也子居母腹以母氣爲氣以母血爲血母呼亦呼母吸亦吸善心生則氣血清和而子性醇惡心生則氣血渾濁而子性劣而母氣之清濁善惡又隨時而遷觸物而變非有一成不易之常氣主於心心之神主內而應外外有所接則神動而氣隨之所接善則陽氣動而爲清所接惡則陰氣動而爲濁故妊子之時必慎所感人生而肖萬物者皆母之感而肖化也古者婦人妊子寢不側坐不邊立不蹕不食邪

味割不正不食席不正不坐目不視邪色耳不聽淫聲則生

子端正才德過人昔大任有身能以胎教乃生文王之聖君

子美之

以上本列女傳

故舊說謂受孕三月逐物變化使妊母常觀

犀象珠玉寶玩之物禮樂鐘磬俎豆之事誦詩書箴誠琴瑟

詠歌欲得賢人長者論述古今忠孝之事盛德大業之人則

生子多男氣正而質純賢良而壽考亦不過欲和其心志絕

其嗜欲使心靜於內慮謚於中清氣充滿濁氣自消卽胎教

之道也夫草木之生其形色臭味皆秉天理自然之化而何

以遷地則形色皆殊而技者又有栽種灌溉之法可以轉白

爲赤易苦爲甘草木尙然况人之至靈者乎至男女之分定

於祖氣非人力所能轉移舊有轉女爲男之法如繫弓弩弦

千金方取弓弩弦一枚絳囊盛帶

佩雄黃

千金方雄黃一兩絳囊盛帶之置

斧牀下

千金方以斧一柄置妊母牀下繫刃向上勿令人知

或驗或否會其適然亦

可以祛邪辟惡以衛陽氣無損於事若欲服藥物以改之無是理也妊母常食松子令子堅實常食砂仁可令速產達生編云常以麻子油和腐皮食可令滑胎又云始覺有妊以布一幅橫束之上緊下寬至臨產始去可令易生蓋使腹中偏窄胎不上長乍去則驟寬產時便利故也大凡攝養之道在善調其心氣此非醫者所能爲夫生子不善人之所惡人之不善雖由習欲實本性生孔子曰惟上知與下愚不移推原其故皆由未生以前理微而顯事小而大在智者心知其意而變通之教於已生之後莫若教於未生之時以可爲者責

之。人。以。不。可。爲。者。聽。之。天。是。亦。爲。人。父。母。者。所。當。究。也。



孕忌第四

生人誕育天理自然陰陽滋化本無災害而每有孕而不固固而不育育而輒夭者豈生化之理有所異哉攝養有乖逆其滋生之道也古者婦人有孕卽退居別室謹持胎教故彌月而生無災無害今人不然或有孕而不知不事養護其知者又不知所忌不慎起居勞役失宜舉止違理欲其無患不亦難乎夫人有富貴貧賤之異而誕育則皆同而產孕之變多起於富貴之家人與禽獸各稟氣血以生而禽獸之生初無墮落難產之患豈非嗜欲有多寡之異生理有順逆之分乎。

懷孕之後首忌交合蓋陰氣動而外泄則分其養孕之力而

擾其固孕之權。且火動於內。營血不安。神魂不密。形體勞乏。筋脈震驚。動而漏下。半產難產。生子多疾。而天淫濁而鈍甚。至孕猶未固。輒動而墮之。一再墮後。胞室寒滑。隨孕隨墮。終身無子。而不自知。亦可慨矣。居處動作。最易損傷。起於細微。人所不覺。體候虛羸者。尤宜慎之。毋登高。毋作力。毋疾行。毋側坐。毋曲腰。毋跛倚。毋高處取物。毋向非常處大小便。毋久立。毋久坐。毋久卧。毋犯寒熱。毋冒霜雪。露霧暴雨。酷日烈風。疾雷。毋視日月。薄蝕虹霓。星變。毋觀土木工作。及怪獸異鳥。奇詭之物。毋入神廟寺院。睹猙獰險惡之狀。一舉一動。必謹飭之。五志之發。鮮能和平。而產孕最宜調抑。孕藉母氣以生。呼吸相通。喜怒相應。一有偏倚。卽致子疾。宜和其心志。毋暴

喜毋過思毋怒毋恐毋悲毋憂慮毋鬱結顏無忤色口無惡  
聲心無雜念使血氣和平德性凝定不特孕安且生子英賢  
無疾而壽矣其飲食則以沖和澹泊爲正節厚味禁腥濁毋  
飲醇酒毋食異味千金方云食山羊令子多疾食兔令子缺  
唇食犬肉令子無聲食桑椹鴨卵令子側出心寒食雀令子  
性淫食鼈令子項短食薑芽令子多指雞合糯米食令子生  
寸白蟲雞及乾鯉魚食令子生瘡食鮮菌令子驚風食冰漿  
令胎絕食騾馬驢肉無鱗魚螃蟹皆令難產食薏苡莧菜蒜  
葱麥芽皆令墮胎其藥味則宜和平調攝毋犯金石毋近毒  
藥大熱大燥大攻大表大寒大涼走竄迅疾泄利之品咸宜  
禁止卽需施用宜詳酌而慎處之凡妊娠起居飲食惟以和



平爲上。不可太逸。逸則氣滯。不可太勞。勞則氣衰。五月以前。宜逸。五月以後。宜勞。冬毋太溫。夏毋太涼。食毋過飽。飲毋過多。養孕之經。不可灸刺。無故不宜服藥。調之抑之。務使無偏。則得之矣。

孕疾第五

妊娠諸疾與常人殊。故治法亦異。子居母腹。藉母氣固之。母氣不順。子不得安。必有墮落之患。子氣既損。母氣亦傷。治之者。或僅護胎。孕不敢攻疾。或亟於治疾。不顧子氣。致子母交損。大小殞亡。慘烈之禍。於此爲甚。素問曰。婦人重身。毒之何如。曰。有故無殞。亦無殞也。大積大聚。可犯之也。衰其大半而止。夫大積大聚。病之重者。苟不亟治。立見危迫。故必毒之。使邪去而孕安。然恐藥勢太過。正氣易傷。故衰其大半。卽止。不治。古人立法。動出萬全。不可不究也。

懷妊之後。必患惡阻。惡阻者。謂惡心阻其飲食也。由於經脈既閉。藏氣不宣。津液停淤。水濕爲患。故其候四肢沉重。惡食。

嘔吐偏嗜一物頭痛眩暈多臥少起若面色如故脈象和平此不須醫但調其飲食適其寒溫緩緩可愈其甚者大吐嘔血食飲不下寒熱往來心中憤悶惡聞食臭肢節疼痛疲怠自汗色萎肢瘦勢若危殆或施治不善逆其胎氣致暴作吐下困頓欲絕則宜橘皮茯苓湯。

橘皮茯苓湯

橘皮 一錢 茯苓 二錢 蘇梗 八分 歸身 一錢五

分 白芍

炒 一錢五分

砂仁 五分 生薑

搗去汁 三錢 青竹茹 八

分 炙甘草 五分 作一服

三四服不愈宜半夏茯苓湯三五服必愈

半夏茯苓湯 半夏 茯苓

各三錢 乾地黄 生薑 各二錢五分

橘皮 旋覆花 細辛 人參 芍藥 芎藭 桔梗 甘草 各一錢七分

十二味以水三升煮取一升分三服若客熱煩渴去細辛

加前胡知母各一錢七分若冷痢者去乾地黃加桂心一

錢七分

熬服後忌生冷醋滑油膩等物見千金方

妊娠傷寒以安胎為主無犯胃氣不可妄汗吐下泄利小便其候輕者頭痛煩熱宜芎蘇飲

芎蘇飲芎藭紫蘇葉白芍藥白朮麥門冬陳皮乾葛各一

錢甘草五分生薑三片葱白三莖十味作一服見東醫

寶鑑

甚者壯熱不解欲汗之宜葱白湯

葱白湯葱白十莖生薑六錢二味以水一升煮五合作二

服見千金方

不解宜拭身法

拭身法麻黃

二兩六錢

竹葉

三合

石膏

一升

三味以水二

升六合煮取一升去滓冷拭身體以故布掩頭額心胃燥則易之。見千金方。

熱病者宜豆豉湯。

豆豉湯豆豉

三合

葱白

一兩六錢

二味以水二升煮一升

分三服取汗。見千金方。

大煩熱宜葛根汁飲解之。

葛根汁飲葛根汁

六合

分三服間四刻許進一服。

見千

金方

皆須用固孕法以安其孕。

固孕法取竈中黃土水和塗臍乾復塗之 見千金方

又方萍朴硝大黃蛤粉藍根等分貼臍上 見得效方

妊娠煩懣悶瞀謂之子煩此由痰濕壅鬱熱氣薰蒸上焦之氣不得流暢熱鬱過甚則胎動漏下宜竹瀝湯

竹瀝湯竹瀝 三合 麥門冬防風黃芩茯苓各 一兩 五味以

水一升煮六合分三服白 見千金方

中風口噤項背強直筋脈拘攣發搐不止痰盛昏迷或時作時止名曰子癇宜四物湯量加驅風逐飲之藥甚則宜羚羊角湯

羚羊角湯羚羊角 鎊 棗仁獨活五加皮加 一錢二分 防風

薏苡仁當歸芍藥茯苓杏仁各 七分 甘草木香各 五分 薑

三片 作一服 見醫學正傳

水腫脹滿謂之子腫其候或遍身浮壯或手足攣腫或肚腹壅大高過心胃氣逆喘急甚則損胎此因水氣過甚正氣不化溢於皮肉輕者產後即愈不必施治甚者宜鯉魚湯

鯉魚湯 鯉魚一頭重十兩 白朮生薑各一兩六錢 芍藥當

歸各一兩 茯苓一兩三錢 六味以水四升煮魚熟澄清取

二升六合內藥煎取一升分三服 見千金方

或苓朮湯

苓朮湯 茯苓白朮各一兩三錢 黃芩杏仁各一兩 旋覆花

三錢 五味以水二升煮八合分三服 見千金方

小水淋痛謂之子淋此由下焦氣化壅閉不行故水道不利

鬱而爲痛宜葵子散解之

葵子散冬葵子赤茯苓各等分爲末每服二錢米飲調下

見金匱要畧

若便閉不通者謂之轉胞乃胎氣陷下壅遏過甚氣道梗阻故水不得通虛人多有之宜參朮飲

參朮飲人參白朮半夏陳皮芎藭當歸芍藥乾地黃各一

錢甘草五分生薑三片作一劑服後探吐之見丹溪心

法

甚者宜腎氣丸

腎氣丸熟地八兩山茱萸四兩山藥四兩丹皮三兩茯苓

三兩澤瀉三兩附子一兩肉桂一兩丸如桐子大每服十



五丸米飲下。見金匱要畧。

若遺溺者白薇方主之。

白薇方白薇芍藥各等分爲末酒服一錢。見千金方。

久嗽不止謂之子嗽。此外感風寒也。甚則動胎。宜百合湯。

百合湯百合三錢紫苑一錢貝母一錢白芍一錢五分當

歸一錢五分前胡五分茯苓二錢桔梗一錢五分蘇葉五

分九味作一服。

下痢赤白謂之子痢。其候腹中疼痛裏急後重。不得以尋常治法施之。宜薤白飲。

薤白飲薤白三合石榴皮黃連各六錢阿膠一兩地榆一

兩炙。以水二升煮六合分三服。見千金方。

若注下不止宜膠艾湯

膠艾湯阿膠艾葉石榴皮各六錢五分以水二升煮六合

分三服見千金方

若下膿血宜白朮湯

白朮湯白朮當歸黃芩各三錢作一服見醫學正傳

寒熱往來一日一作或間日一作若有定期謂之子癎發當

夏秋宜香薷保安湯

香薷保安湯香薷八分柴胡羌活各五分陳皮六分白朮

二錢黃芩一錢炙甘草四分當歸一錢五分生薑一片棗

二枚作一服

在冬春宜驅邪湯

驅邪湯白朮藿香砂仁茯苓各一錢橘紅草果各八分甘

草五分薑三片作一服見丹溪心法

胃滿腹脹氣逆上干謂之子懸此由中焦氣結之故多得之  
憤鬱驚惶宜紫蘇飲

紫蘇飲紫蘇葉一錢五分人參大腹皮芎藭陳皮白芍當

歸各一錢甘草五分薑三片葱三莖作一服

或葱白湯

葱白湯葱白二十莖以水一升五合于銀石器內煮取半

升頓服并食葱見婦人良方

若心痛者宜竹皮湯

竹皮湯青竹皮三合以酒六合煮三兩沸頓服見千金

方

腹痛者宜芎朮湯

芎朮湯黃芩

一兩

芍藥

一兩三錢

白朮

六兩

以水二升煮

取一升分三服 見千金方

腰痛者大豆酒主之

大豆酒大豆

三合

以酒一升煮取六合頓服

見千金方

妊娠下血謂之漏胞甚則崩決不止陰氣不固熱動於內傷其脈絡故營血內溢血盡則死宜地黃飲

地黃飲生地黃

二兩六錢

清酒一升煮三沸去滓頻頻服

之或入雞血少許 見千金方

或地黃散

地黃散。乾地黃搗末酒服。三指撮許。三服。瘵。見千金方。  
若胎動不安。腹痛繞臍。腰背皆痛。卒有所下。或叫號口噤。四  
支厥冷者。宜艾葉湯。

艾葉湯。艾葉。阿膠。芎藭。當歸。各一兩。甘草六錢。以水二升。

六合煮一升。分三服。見千金方。

若因交合而動胎者。宜八物膠艾湯。

八物膠艾湯。人參。白朮。茯苓。各二錢。芎藭一錢五分。當歸

一錢五分。白芍二錢。乾地黃三錢。阿膠二錢。艾葉八分。

見醫學入門。

因飲酒而傷者。宜黃芩湯。

黃芩湯。黃芩。白朮。當歸。砂仁。各一錢。作一服。日二。見得。

效方

因喜怒而傷者宜佛手散

佛手散當歸

五錢

川芎 藜

三錢

作一服

見丹溪心法

因鬱悶而傷者宜葱白湯

見前子懸下

因勞役而傷者宜安脈湯

安脈湯人參白朮各

二錢

當歸

一錢五分

阿膠

三錢

炙甘

草陳皮各

五分

芎藭

一錢

兔絲子黃芪各

一錢五分

杜仲

二錢

因跌墜而傷者宜續杜丸

續杜丸續斷杜仲各

二兩

棗肉搗爲丸如梧桐子大每服

五十九丸米飲下

見醫學入門

若腰痛損傷下血不止宜馬通湯。

馬通湯馬通汁

三合

乾地黄阿膠各

一兩三錢

當歸艾葉

各一兩

以水一升六合煮取八合內馬通汁及膠令烱分

三服。見千金方。

若胎奔上搶心危急之候宜艾葉地黄湯。

艾葉地黄湯艾葉

一兩

阿膠芎藭芍藥甘草當歸各

六錢

乾地黄

一兩三錢

以水一升六合煮取一升內好酒二升

內膠令消分三服。見千金方。

甚者血從口出逆不得息宜蟹爪湯。

蟹爪湯蟹爪

三合

甘草桂心各

三錢

阿膠

六錢

以東流水

三升煮一升內膠分二服口噤不能服者挾口灌之藥下

便活也。生胎卽安。死胎卽下。見千金方。

若因毒藥攻胎。胎動欲墮。血逆衝心。悶亂喘促。大汗不止者。宜白扁豆散以解其毒。

白扁豆散。白扁豆爲末。新汲水調下。二三錢。口噤者。斡開灌之。見得效方。

若因高取物。胞系有傷。兒啼腹中。則令妊母曲身向地拾物。須臾卽止。

若腹中作鐘鳴聲者。取鼠穴中土噙之。

八九月瘖不能言者。不須治之。產後卽愈。

凡胎動無故而動。及體素羸弱者。乃衝任脈虛。不得固攝。當大補之。腹痛者。宜行其氣。損傷者。宜行其血。餘各因其所由。



治之

未及期而產謂之半產。卽墮胎也。損氣耗血甚於正產。二三月猶輕。六七月爲最重。譬之果未熟而強摘之。其根蒂必傷也。故凡半產當與正產同其調養。而尤加意焉。宜因其所傷而補益之。以善其後。前列諸法皆可參用。若輕易視之。則一次半產後。遂習以爲常。不得謂非失治之過也。半產後治疾之法。與正產稍異。蓋正產惡露多半。產惡露少也。若有腹痛等疾。宜溫補之。逐瘀破血之藥。用宜審察。若數日後大熱而渴。面紅眼赤。欲飲涼水。晝夜不息。此大虛也。寒涼下咽。卽死不洽。宜當歸補血湯。

當歸補血湯黃芪

一兩

當歸 二錢

水煎作一服

見內外

傷辨

若血崩不止者宜攝陰湯

攝陰湯黃芪

五錢

阿膠

三錢

歸身

二錢

白朮

二錢

甘草

五分

炙

櫻櫚皮

一錢

烏賊骨

一錢

五分

荆芥

一錢

炒

其他諸症並詳正產相時度勢消息用之未可拘泥爲也



產孕集下篇

陽湖張曜孫箸

吳縣潘希甫校

辨產第六

孕滿十月待時而生自然之道無所勉強而世俗不察或未  
產而強速之致有橫逆之變推其故由於未明其理不辨其  
候而然故初覺腹痛遂謂欲生稍事遲延遂謂難產方藥以  
攻之非法以擾之使氣督神亂子母俱死富室巨家其弊尤  
多本安也而自危之本生也而自殺之可憫也已辨產之法  
脈經曰妊婦月滿則脈離經離經者難經所謂一呼三至曰  
離經一呼一至亦曰離經也又曰尺脈轉急如切繩轉珠者

欲產也。千金方論曰：將產者，離經離經者，其脈浮。朱彥修曰：離經六至沈細而滑，按切繩轉珠動疾之象，卽一呼三至之義。一呼三至，一吸三至，呼吸定息，脈七至，閏以太息，脈八至，疾之甚也。朱說與千金方不同，當以難經脈經爲正。要之胎動欲產，無論浮沈遲速，皆有動象，無動象者，非正產也。

正產腹痛，必連腰及臍，或牽引脊背，胎氣陷下，或目中生火，穀道挺迸，漿血下後，腹痛愈緊，乃爲欲生。若漸痛漸緩，或乍緊乍慢，卽漿血交下，皆非正生。達生編言：試痛正產之辨，誤以試痛爲正產之害，推勘極精，多可采者。達生編云：初覺腹痛，第一以忍痛爲主，無論爲正產，爲試痛，痛久自生，更宜養神惜力，以安睡爲妙，不可輕易臨盆。蓋子居母腹，端坐不動。

至生時。轉身向下。姪母安臥腹中。不至偏窄。易於轉身。若未及轉身。遂使坐草。則嬰兒難於轉運。復用力以注之。則足先出。而成逆產。轉身未定。用力逼之。則手先出。而爲橫生。或首骨偏礙。而爲偏產。種種弊端。皆基於欲速之故。故臨盆以緩爲正。卽使過遲。亦無妨碍也。又曰。孕至八九月。或姪母有火起。居不時。令孕不安。因而作痛。所謂試痛也。但須照常眠食。甚則服安胎藥一二劑。卽止。若誤作欲產。遽令坐草。卽使勉強能生。母氣必損。子亦多天。猶之剖卵出雛。裂繭取蛹。安望生耶。又曰。腹痛有感寒傷食之候。亦宜辨別。傷食者當臍而痛。手按轉加。或臍旁如有臍起者。不連腰及脊。寒痛多在臍下。綿綿延延。無所增減。得煖少安也。凡此皆極言欲速之害。

而歸於辨產未明。蓋姪母多畏難產而欲速產者在主者察脈晰理明辨而調抑之事常而易變苟不慎察戕害生命亦非俯育之道。慎母謂閨房瑣屑之事非丈夫所宜知而忽畧視之也。

產戒第七

產育順事而俗人多擾亂之致反順爲逆此雖習俗使然亦不知之過也輯產時所當戒者著於篇使覽者凜焉

姪母將產率多疑懼腹痛緊急氣血下注神不能安易於驚惶初次產育尤爲易擾而不知者稍有不順輒恐懼無主大事張皇致姪母心亂神散氣憊而逆氣逆則血湧氣憊則力衰嬰兒之生雖自能轉動亦藉母氣助之氣逆力衰何以能下唯宜溫慰姪母使勿驚疑卽有不順勿使知覺俾心定氣凝神安力旺無論本屬順生卽遇惡候亦可反逆爲順也

千金方論云產事雖係穢惡然不得令死喪污穢之人視之犯者多致難產又忌多人瞻視惟得一二人入室產後乃可



告人亦以人衆則易於驚擾致妊母心神不定故也。

室中宜適溫涼。夏暑過甚勿掩門戶。以器貯新汲水石許置室中。以辟熱氣。免致昏暈。夫寒宜置火暖之。毋得大熾。令火氣熏灼。室中人毋大聲。毋多語。毋嗟咨太息。毋訝駭。毋叱咤。毋祈神問卜。宜安靜如常。

妊母宜惜力。宜安臥。臥宜正。不可左右。毋摩腹。毋按腰。毋妄動。毋輕坐。草初產及天寒尤忌。美其飲食。頻頻與之。若虛羸者不能多食。以糜粥雜人參末飲之。毋亂服方藥。毋輕試異術。必辨明正產胞水已下。交骨不開。或交骨已開而子久不下。擇平和之藥稍稍助之。要之產前調攝既善亦無須此。接兒老嫗俗謂穩婆。宜豫擇妥善者用之。蓋隱曲之事非此。

輩不能爲而愚蠢奸狡之輩或妄爲動作故事恐嚇戕人性命以炫己之術不可不慎大率以年老爲佳蓋年老則歷事多而性稍醇也

產後勿問男女須收拾既定然後告人世有急於求嗣者墮地得男而產母暴喜遂致昏暈得女則產母不悅家人又從旁懊惱之致有鬱厥血逆之患宜豫防也

大凡產厄誤於張皇者半誤於怠忽者亦半產育固生人常事然苟主者不察而漫然聽之則產母無主而驚疑爲害亦太往見拘迂者矯張皇之弊謂嬰兒可以自出無藉乎人因閉門安臥勿令人知而產母體素羸弱氣血虛少又性本嬌怯不能忍痛曲腰護之偏倚妨之輾轉敲仄致嬰兒不得轉

動交骨不得開張氣血下注久無泄路勢必逆而上行一日之間而子母俱死如此者何啻無故而自殺之哉此皆不明其理不究其道愚而自用殘賊人倫夫產孕者生生之本夫理之原似續攸關斷宜詳慎也

用藥第八

產時用藥有二弊焉。方伎之士多取速效，肆用峻利之藥，以炫己之術。其效者，藥甫入口而難產，卽下。衆人駭服，推爲神奇，而不知一時便利，子母大傷。至產後發疾，遂至不起。嬰兒或墜地不舉，或舉而輒夭，而又委之天命。歸咎後醫，自殺生。命而人莫之知，深可痛惜。古方如兔腦、鼠腎、蛇蛻、同生諸藥，只堪備至急之用，安可妄試。尤有甚者，挾不經之術，無稽之方，展轉傳布，謬爲仙授，乘人之急，以脅人之利。功則歸己，過則歸人。世俗憤憤多爲所愚，不可譬曉。此一弊也。而矯其弊者，遂謂產孕本無須用藥，常變順逆，悉靜而聽之於天。斯言誠善，然必自懷妊至臨產攝養無乖，然後可也。苟或不善，卽

可反順爲逆而仍執勿藥之說以自愚是何異未能辟穀而謂人可勿食耶此二弊也且天下亦或有生而難產者或未孕之先卽有宿疾或氣血羸弱骨格緊密脈絡堅緻皆令難產亦藉臨時藥力以扶助之但宜斟酌盡善擇平和之品醇正之法相不得不用之時而後用之如加味芎歸湯佛手散味和而力厚氣平而效速斯爲善也

加味芎歸湯當歸

一兩

川芎

七錢

龜板

手大一片  
醋炙研

婦人髮

如雞卵大一枚  
瓦上焙存性

水一升煎四合服之

見醫學入門

佛手散

見前孕疾篇

富貴之家產後必服人參而致死者多矯其弊者并倡產後無補益之說而致死者亦多蓋不明其理左右皆誤夫產後

諸疾多出於虛人參非不可用而用之亦自有法得其法益身而卻疾不得其法致疾而促生不可不辨服參之法在子方墜地參已入口一刻之間過此一刻便不可服蓋產時氣血下注上中二焦盡屬虛寒產後氣復上行下焦惡血填湊血道梗塞氣道亦滯驟加補中之藥血道未開氣道益阻遂有惡露不行淤血上逆之患若當兒甫墜地一刻之間氣血猶未上行藏府空虛脈絡困乏人參入腹甘溫之性宅中土而運脾精輔正氣而逐惡血灑播精微灌溉經脈氣強則行速脈潤則道通惡露順下乳汁通流焉有他患且新產之後百脈皆動而下行自下而土淤濁者去精華者留有更新之象婦人宿疾多在血分平時所不能除者此時可以除之卻

病益身非妄說也。

凡欲服參者將產時卽宜製就汁宜濃厚可以一飲而盡

或以

人參一二錢研爲末另以錢餘煮汁調服亦可令一人司之俟兒首旣出卽與服之

參盡而兒適墮地乃爲合法苟失其法爲害非小而復歸咎於參之不可用豈不謬哉

產時應變皆倉猝之際所有藥物亦宜豫籌有備無患不可渴而掘井鬪而鑄兵也

應變第九

產育本順事不幸而至於逆變起倉卒安危係於片時亦人生至急之事極難之治也應變之術宜切究焉凡產之變有五曰橫產曰逆產曰偏產曰礙產曰盤腸產

橫產者兒橫腹中手臂先出治法令產母仰臥囑收生嫗徐徐推兒下身令直上以手中指摩其肩推上而正之又以手摩其耳令頭正自生或以小鍼刺兒手入一半分徐徐送入不入以鹽塗之

逆產者兒未轉身兩足先出以鹽塗兒足心鍼刺如上法或以爪搔之并以鹽摩母腹兒得痛痒驚縮而轉自當迴順偏產者產時兒首偏挂一傍雖近產門只露額角終不得下



治法令收生嫗以手徐徐正其頭若因腦骨偏拄穀道當以  
綿衣炙火令熱裹手於穀道外徐徐推之俟正然後坐草若  
產時兒不向產門直趨穀道者宜熬鹽令熱以紬裹于穀道  
外熨之。

礙產者兒首正抵產門久而不下此必轉身時臍帶攀掛兒  
項或肩當急令安臥令收生嫗推兒近上徐徐通手以中指  
按兒兩肩理脫之然後坐草蓋此候最爲險惡慎毋輕易用  
力若纏繞於項復用力以注之則其纏愈緊致子死腹中不  
可不慎凡橫逆諸產如法拯救皆宜內服加味芎歸湯佛手  
散加味芎歸湯見用藥  
篇佛手散見孕疾篇以助之若不能用法但令靜心安臥  
服前藥一二劑亦效。

盤腸產子腸先出兒卽隨下或腸隨兒下此由下焦素虛不得收攝氣血下注無以固之或用力太過一次如此凡產皆然宜以溫湯潤之溫諭產母勿令驚慌以好醋半盞新汲水加醋十之七調和驟喫產母面或背三喫則收或以磨刀水微潤腸煎磁石湯一盞飲之或以葶蘇子搗敷產母頂心視收入速洗去遲則爲害內宜服補益升提之藥慎護其腸勿令見風若遭風侵多有不能收入者

產時交骨不開最爲惡候此由陰氣大虛血液衰少宜加味

芎歸湯

方見前

甚者加桂少許

子死腹中其候心腹脹悶重墜異常產母面赤舌青指甲皆

青或口出惡臭者是也若面舌唇口俱青口沫出者子母俱

死面青舌赤者母死子生宜佛手散方見前或平胃散

平胃散蒼朮厚朴薑汁炒陳皮各三錢甘草一錢二分水煎

加朴硝二錢化服其效頗速 見局方

或蟹爪湯

蟹爪湯蟹爪一升甘草一尺阿膠一兩以東流水三升煮

蟹爪甘草得一升去滓內膠令烱分二服 見千金方

若雙胎一死一生者服之能令生者安而死者出若乾燥著脊不能下者宜葵子湯脂蜜酒以滑之

葵子湯葵子三合阿膠一兩六錢以水一升六合煮六合

頓服未效再作一服 見千金方

脂蜜酒猪脂白蜜各三合醇酒六合合煎取六合分二服

見婦人良方按無猪脂以麻子油易之亦可。

產時用力太過水衣早破漿水盡下產戶乾澁或坐草日久爲風所吹因而腫脹多致難產或產時子忽不動是妊母力乏之故勿誤爲死肆用攻逐皆宜加味芎歸湯方見前

產時妊母忽猝然氣痿暈絕目翻口噤面黑唇青口沫流出子母俱殞若兩顴微見紅色子死母生此至危之候宜霹靂丹救之。

霹靂丹蛇蛻一條蠶退紙並燒存性各用二錢男子頭髮

燒灰路旁左足草鞋燒存性各用一錢乳香五分黑鉛二

錢五分水銀七分五厘以鉛和水銀入鍋中火上鎔花結

如砂子研治爲末和諸藥以獾猪心血和丸如梧桐子大

金箔爲衣。每用三丸。流水下。或煎化灌之。見醫學入門。

嬰兒既生。胞衣不下。亦多危險。達生編云。用力太早。交骨強開。兒甫出而骨卽隨閉。以致不下。宜急斷臍帶。以麻線將臍帶繫緊。又雙折之。再繫一道。勿令風入。以輕物墮之。但令產母安心。定氣。稍遲當痿而下。慎勿令收生嫗妄用手取。致損及臟腑。因成惡疾。若血流入衣中。爲血所脹。致不得下。腹中脹滿。上衝心胃。疼痛喘急者。宜佛手散。方見前

若以手按之。痛稍緩者。此氣虛也。宜益母湯。

益母湯。益母草一兩。酒煎。加童便一杯服之。見達生編。

若危者。宜牛膝湯。

牛膝湯。滑石

二錢研末

木通。當歸。牛膝。瞿麥。各

一錢五分

冬葵

子二錢。共作一服。見局方。

若急上搶心者。或死胎上搶心者。宜用熨法。

熨法取蟻垤土一升。熬熱囊盛。熨心下。令不得上。見千

金方。

若輕者。以草紙燒烟熏產母之鼻。令納氣。卽下。或以髮入口。作嘔亦佳。

千金方載產時禳法。雖未明其理。而頗有效驗。并附著以備用。凡欲產。宜脫尋常所著衣籠。竈頭及竈口。令至密。卽易生。若逆生者。以手中指取釜底墨畫兒足下。作叉形。卽順生。或書父名於足心。或以車轄脂如上法書畫。若胞衣不下。取夫內衣蓋井上。卽出本草載臨產取赤馬皮鋪身下。又以海馬

石燕兩手持之皆令速產云  
凡應變皆以凝神息慮爲主毋得張皇以擾產母心欲細而  
定智欲敏而速法欲簡而捷藥欲峻而安毋取劫功毋貽後  
患凡遇危急無不皆然不特產孕之一端也

調攝第十

產後調攝最宜詳慎蓋產後氣血虛少絡脈空乏肢節懈怠  
腠理開張皮毛不寔營衛不固血道易塞氣道易滯故致疾  
之易而去疾之難莫甚於此產後致疾皆起於纖細易忽之  
間其源甚微其發至鉅闔房瑣屑之事主者所不及檢醫書  
所不能詳不識避忌不知防範或致疾而終身不愈或疾作  
而危在片時往見一婦產時至速不及告人遂產於地產後  
人知始扶臥於榻三日後大熱不止醫以爲血淤也而以桃  
仁承氣投之數日而死一時不謹爲害如此況其大焉者乎  
故善調攝者不使致疾并可去宿患之疾不可不知也  
凡產後產母勿令安臥宜以高枕倚之膝宜豎起勿得伸直



者宜頻頻呼之常令欲醒亦毋高聲急語致使驚恐蓋產後氣血上行若遽令安睡則氣逆而血壅多致昏暈必豫防之膝宜豎者膝伸則筋骨內掩恐礙惡露也

嬰兒墜地卽取鐵秤錘或石子入火燒紅以醋向產母焯之使氣入鼻不特可以辟穢且能收斂神氣散解惡血以杜血暈或日焯一二次三日後止更佳

室中宜避風絲毫罅隙必掩塞之宜適溫涼毋犯寒暑將寒卽衣驟煖毋易夏雖大暑勿得解衣毋浴毋以扇招風寧失過煖毋失過寒

產後宜益母草煮汁和童便服之或和清酒日三五服三日

而止自產之次日始日服生化湯一劑

生化湯川芎

一錢

當歸

五錢

甘草

五分

乾薑

五分

桃仁

十粒

去皮

以水二盞煎一盞入清酒一合溫服

五日而止淤未盡者七日止大虛者可加人參少許服之二三日後或寒熱交作此骨合也虛人多有之但診無他患如法服生化湯勿妄用他藥

十二日後惡露將盡氣血更新體虛者宜服補虛湯

補虛湯人參白朮各

三錢

當歸川芎黃芪各

二錢

炙甘草

陳皮各

八分

乾薑

五分

八味作一劑日一服

見醫學入

門

十數服有宿疾者宜服永安湯

永安湯人參一錢熟地三錢當歸三錢芍藥一錢阿膠一

錢五分白朮二錢續斷一錢五分桃仁烏賊骨各一錢吳

茱萸四分十味作一服食前溫進日一

或澤蘭湯

澤蘭湯澤蘭二錢香附二錢當歸芍藥各一錢五分芍藥

烏藥各一錢人參一錢阿膠黃芪白朮各三錢紅花五分

生薑二錢作一服食前溫進

羊肉湯

羊肉湯羊肉十兩黃耆一兩大棗三十枚茯苓甘草當歸

麥冬地黃芍藥各六錢肉桂心三錢以水六升煮羊肉取

三升內藥煎取一升分三服溫進見千金方

相疾之輕重體之偏寒偏熱而用之或十餘服或數十服可使宿疾盡去體弱反強

飲食宜澹泊毋食鹽犯之令無乳毋食生冷堅硬一切異物毋食炙燻煎炒毋過於肥膩皆令致疾十日內毋食猪肉一月內毋食豬脂犯之令經絡壅塞凡食肥甘之物皆宜去油脂以清淡爲上清本乎陽可以益神而育精濁本乎陰足以致滯而成積而酸醜之味凝血阻脈尤爲切忌也

產後一月俗謂之滿月二月謂之大滿月此二月內不宜力役動作不宜交合心志宜和思慮宜絕悲恐憂鬱大喜大怒皆不可犯七情傷人甚於六氣世有產後羸瘠謂之蓐勞多至不治皆不知調攝之故也



懷嬰第十一

千金方論曰。嬰兒初生。當卽舉之。舉之稍晚。則令中寒。先浴之。然後斷臍。斷臍不得以刃。令人隔衣咬斷之。以煖氣呵之。然後纏結。所留臍帶。須令至小兒足趺短。則兒腹中不調。常下痢。若先斷臍。然後浴者。則臍中水令常腹痛。其臍斷訖。連臍帶中多有蟲。宜急撥去之。不爾。則入兒腹。成疾。裹兒臍法。椎治白練。令柔軟。方四寸。新綿厚半寸。與帛等。合之。調其緩急急。急則令兒吐。若十許日。兒怒啼。似衣中有刺者。此或臍燥。還刺其腹。當解之。易衣更裹。裹時閉戶。下帷。燃火。令溫煖。仍以溫粉粉之。若臍不愈。燒絳帛末粉之。若臍中水。當炙粉絮。以熨之。不時治護。

浴兒法。湯須調冷熱。冷熱失宜。令兒驚。凡兒冬不可久浴。久則傷寒。夏不可久浴。久則傷熱。浴兒者。以猪膽汁一枚。取汁投湯中。以浴之。終身不患瘡疥。兒生三日。宜用桃根湯浴之。  
頁

桃根湯。桃梅李根各三兩。以水三升。煮二十沸。去滓。無根枝亦可。

生男宜用父故衣裹之。生女宜用母故衣裹之。皆勿用新帛衣。不可過厚。令傷兒皮膚。害血脈。嬰兒始生。宜時見風。日。凡天氣和煖。無風。宜令乳母將兒於日中嬉戲。則血凝氣剛。肌肉牢密。堪耐風寒。不致有疾病。

達生編云。兒生三日。浴之。俗謂之洗三。如冬寒切不可洗。然

千金方謂小兒不浴令毛落則不浴亦非良法宜如上法蔽風燃火下帷而浴之又云斷臍必以艾蘸油爲燃燎斷之令煖氣入腹常視之勿令濕較千金法爲佳南中收生嫗斷臍多於連胞衣處斷之并留胞衣少許先繫緊然後斷之雖臍帶稍長易於妨礙然可免入風泄氣之患亦可用也

嬰兒甫生氣欲絕不能啼以煖水灌之不啼以綿絮包裹之勿斷臍以紙撚蘸油燃火於臍帶下熏之令煖氣入腹更以熱醋湯盪洗臍帶令氣回啼哭如常方可斷臍

若面青身冷口噤者乃胎寒也宜殭蠶散急救之

殭蠶散白殭蠶木香肉桂陳皮炙甘草檳榔各五分水煎

取汁以帛蘸入兒口中見醫學入門



若因臍纏喉管礙產者急去其所纏之臍輕按其背俞及胃  
口徐摩其喉管卽氣復而啼。

初生有卽死者急看兒口中懸雍前腭上有泡如石榴子以  
指摘破出血以帛拭去以髮灰糝之若令惡血入口中卽死  
初生撮口不飲乳名曰馬牙不治則死馬牙之候兒齒齦有  
小泡如粟米狀急以鍼挑出血用墨磨薄荷汁斷母髮裹手  
指蘸擦口中令遍勿飲乳一時許卽瘥。

初生穀道無孔不得大便急用金玉簪揣其是孔處刺通之  
以蘇合香少許作小鋸納孔中或以油紙紐之勿令復合。

若非無孔而大小便不通者氣脹欲絕令婦人以溫湯漱口  
吸啞前後心并臍下手足心共七處每啞三五次漱口更啞。

取紅色爲度。須臾自通。不爾則死。或以葱汁乳汁各半調勻。抹兒口中。與乳吮下。亦通。

若小便不通。不欲飲乳者。以葱白一寸四破之。以乳汁入銀石器內煎灌之。

若生鵞口瘡者。其候口內白屑遍生。舌上鼻上皆有之。不能吮乳。急以亂髮纏指。蘸薄荷汁。或井華水拭之。三日當脫。若不脫。可煮茯苓汁令濃。以帛纏筋頭拭之。無茯苓。栗木亦可。或以白楊枝燒灑塗之。

初生遍體無皮者。以白早米粉撲之。候生皮乃止。若如魚泡。如水晶碎。則水流者。以密陀僧爲末糝之。

初生患連舌。以爪摘斷之。微有血出。無害。若血出不止。以髮

灰傅之連舌者舌下有膜如榴子中隔連接舌下令兒言語不轉也。

生六七日後氣血收斂成肉則口舌喉頰清淨若喉裏舌上有物如蘆管中盛水狀者或如脹起者可以綿纏長鍼留刃如粟米太刺決之令氣泄去青黃汁日一刺之不過三刺卽愈著舌下者名曰重舌著上腭者名曰重腭治如前法。

初生感風鼻塞不通者取皂角草烏等分爲末薑汁調敷額門或以薑汁調天南星末敷之。

外腎縮入不得出者以硫黃茱萸各五錢爲末以蒜汁調塗臍腹仍以蛇牀子燒烟熏之。

初生遍體發丹毒赤腫遊走若入腹卽死名曰赤游乃胎熱。

也宜以細鍼隨赤暈周匝刺出惡血仍以芭蕉汁或蟻螬汁塗之或以赤小豆末和雞卵白塗之亦良

初生二三日面目繞鼻左右皆黃閉目撮口而啼口中乾燥四肢不得伸縮者乃血脈不斂也血氣沮敗不成肌肉故有此候宜龍膽湯

龍膽湯龍膽草鈎藤皮柴胡黃芩桔梗芍藥茯苓甘草各  
八分以水三合煮二合兒生一日至七日以三勺分三服

八日至十五日以四勺分三服十六日至二十日以六勺  
分三服二十日至三十日以一合分三服三十日以外以

二合分三服凡寒熱驚掣變蒸不解客忤驚癇食積皆可  
服之見千金方

凡嬰兒甫出先以綿裹指拭口中及舌上惡血若啼聲發便入腹中以成百病斷臍後宜與甘草湯。

甘草湯以甘草如手中指一節打碎以水六勺煮取三勺。

見千金方。

以綿裹沾取與兒吮之計得一蜆殼許入腹止兒胃中有惡物者當快吐之若不吐須臾更與盡之若不吐是無惡物勿更與也。

凡母乳兒不欲太飽飽則嘔吐如太飽則以空乳乳之自消夏不去熱乳令兒嘔冬不去寒乳令兒咳且痢甫交合卽乳令兒羸瘠交脛不能行將乳當先去宿乳又用力極按之勿令乳急出令兒噎若急出以指按夾之噎則奪之令得息然。

後乳之兒若臥乳母當以臂枕之令乳與兒平令兒不噎欲寐則奪其乳恐填塞口鼻且或致過飽母臥母以口鼻向兒恐氣吹其巔頂母有熱勿乳犯之令兒變黃母怒勿乳犯之令生驚發疔上氣顛狂母醉勿乳犯之令身熱腹痛母新吐下勿乳犯之令兒虛羸皆所當慎

富貴家多置乳婦而愚蠢之輩不知慎護不識避忌寒燠失候饑飽違理因而致疾者最多故善懷嬰者當自乳爲善必欲置乳婦宜擇氣血清和肥白壯盛之婦毋犯胡臭癭癩疥癰癰白禿癭瘍耳聾鼻癢癩之疾夫乳者血氣之所爲也兒之性情未定藉血氣以涵養之苟飲以惡濁之乳則氣血日昏性情日劣變清明而爲愚蠢爲患寔深又不特致疾

之一端也

大凡嬰兒氣血薄弱。施治難于常人。小有不慎。卽生重疾。愚醫不察。拘執謬說。肆用毒藥。往往而殤。夫疾作而治之於後。曷若未疾而慎之於先。未生則調之於母。旣生則適其饑飽。量其寒溫。疾從何生。而煩廣設謬方。遍倡邪說。耶集懷嬰一篇。有心保赤者。所當覽也。

拯危第十二

產後諸疾危迫者多頃刻生變有延醫治藥所不及者孫子所謂發於秋毫廣於高岱也而世俗治此恒昧其道稍有不順輒謂不治治之不善又不啻下石而殺之蓋能起死而定亂者鮮矣著拯危一篇以政惑焉產後血暈最爲危急其候兒甫墮地母卽昏絕不省人事急令婦女以膝裹綿軟舊衣曲抵產戶勿令氣泄一人以一手挽頭髮一手掩口鼻俟稍轉動乃可用藥若不醒以韭菜一把細切瓶盛之灌以熱醋以瓶口向產母鼻管熏之仍以鐵石器火燒焯醋令室中常得醋氣或以醋噴其面或以漆器燒之用藥宜辨虛實虛者其候昏悶煩亂卒然暈倒口張手撒遺尿鼾聲四支厥冷寸



口脈微細散亂或伏匿不至此正氣大虛微陽欲脫陰離陽  
決危在俄頃救之稍遲則氣不復返宜清魂散

清魂散人參澤蘭各一錢二分炙甘草一錢當歸芍藥各

二錢荆芥穗一錢作一服水煎加清酒引見婦人良方

定氣飲

定氣飲人參白朮阿膠各三錢炮薑熟附子各一錢大棗

五枚炒粳米一撮濃煎分二服溫進

獨參湯

獨參湯人參四五錢長流水濃煎厚汁灌之見醫說或

加炒米一撮炮薑一錢尤妙

六味回陽飲

六味回陽飲熟地黃

五錢

當歸

三錢

炮薑

二錢

熟附子

二錢

錢

肉桂

二錢

人參

三錢

見幼幼集成

相度用之實者心下滿急神昏口噤腹脹氣粗兩手拳握脈無虛象乃下血過少惡露上逆當破其惡血宜黑神散

黑神散肉桂當歸白芍炮薑各

二錢

乾地黃炒黑大豆各

五錢

見幼幼集成

奪命散救之

奪命散沒藥血竭各等分治爲末每用

三錢

童便清酒各

半煎數沸服神效 見丹溪心法

若舌強不語者敗血壅其脈絡也宜四味散

四味散當歸延胡索血竭沒藥各

一錢

每用

二錢

童便或

清酒調下或并煎作湯亦可 見丹溪心法

若見鬼譫妄言語顛倒眼見黑花者宜辨虛實誤者卽死體素虛弱下血過多昏迷不省眼目無所知甚則循衣撮空錯語失神者虛也又謂之鬱冒暴亡其血陽神無所依附宜安神飲治之

安神飲人參柏子仁

去油各三錢

黃芪阿膠當歸茯神各

二錢肉桂炙甘草各一錢 共作一服

體素壯實下血未多發狂見鬼面青口噤角弓反張者實也敗血干心亂其神明宜蘇合香丸一錢童便調服或奪命散四味散皆宜

方俱見上

血崩不止是謂重傷其候血暴下如注急若山崩故名曰崩

唇青肉冷汗出目瞑此由陽氣大虛不得收攝故直下無制潰決而不可止宜朝宗湯

朝宗湯歸身

一兩

芎藭乾地黄各

五錢

芍藥

三錢

人參黃

芪肉桂炙甘草各

二錢

分二服

補氣養血湯

補氣養血湯人參黃芪當歸白朮芍藥阿膠芎藭各

二錢

艾葉青皮香附甘草各

五分

熟附子

一錢

縮砂仁

一錢

共

作一服見萬病回春

或攝陰湯治之若少腹滿痛肝藏已壞不可治矣

攝陰湯熟地黄

五錢

人參

三錢

黃芪

二錢

當歸

一錢五分

荆芥穗

多

棕櫚皮

多

甘草

各一錢

熟附子

一錢五分

作

一服。

衄血者。口鼻血出不止。口鼻起黑色如煙煤。是胃絕也。氣血散亂多不可治。急以緋線一條并產母頂心髮二莖。合繫產母手中指節。令極緊。仍用荆芥散治之。

荆芥散。荆芥穗爲末。每服二錢童便調下。口噤開灌之。

見婦人良方。

產後大喘乃死候也。此由陽氣素衰。所下過多。血竭於下。氣留於上。無所依附。獨聚肺中。孤陽絕陰。命在呼吸。宜獨參湯。上方見定氣飲。方見上。炮薑。宜易乾薑。六味回陽飲。方見上。輕者小參蘇飲。

小參蘇飲。濃煎蘇木汁。調人參末。二錢。或三錢。作一服。

見東醫寶鑑。

若血下少而作喘者其喘不甚由於瘀血入肺窒碍氣道宜  
桃仁湯治之。

桃仁湯桃仁

二錢炒

杏仁

二錢炒

當歸貝母各

二錢

茯苓

三錢

乾薑人參各

五分

若咳逆不止欲死者以肉桂

五錢

薑汁

三合

同熬稍服半合

許以手摩肺俞令熱以餘汁塗之時摩時塗汁盡卽愈 見  
婦人良方

陰脫者子宮脫出或脫出如脫肛者蓋產時努力所致宜當  
歸黃芪飲

當歸黃芪飲黃芪

三錢酒炒

人參當歸各

二錢

升麻

五分

甘草

八分

右作一服水煎日二

見丹溪心法

若脫出如線長三四尺手觸之則痛甚者宜慎護之不可令斷斷則死以薑三斤連皮搗之清油二斤和炒以油乾爲度以熟絹五尺許疊數層承其線屈曲作圓形納戶口以絹袋盛薑溫熨之冷卽易一日夜當入其半二日當愈仍內服失笑散助之

失笑散五靈脂蒲黃等分爲末每服二錢童便或酒調下

見局方

凡產後危症皆屬虛寒惡血爲患僅十之三四而昧者多以去瘀破血該之肆用攻伐復雜寒涼邪說盛行古法晦昧夫血已亡而復破之陽已衰而復泄之危如轉燭正救猶恐不及而尙妄謬爲之耶有識者尙其慎之毋爲邪說所惑也

去疾第十三

產後治疾當以溫補爲主。去瘀次之。千金方論曰：婦人產訖，五藏虛羸，惟得將補，不可轉瀉。若其有病，不須駛藥。若行駛藥，轉更增虛。就中更虛，向生路遠。朱彥修曰：胎前毋滯，產後毋虛。亮哉斯言，不易之法也。而方今醫者用法多殊。陽虛發熱，妄用滋降，氣逆作喘，謂之痰火。豈未見千金諸說耶？朱氏爲滋陰降火之祖，而於產後大熱亦用乾薑。雖說理未明，而用法則合。而宗其說者，并此而背之，可異也已。

脈經曰：產後之脈洪寔不調者死，沈微附骨者生。又曰：沈小者生，寔大堅強急者死。蓋產後當虛沈小，而微虛寒之象也。當虛反實，則陰陽相并，氣血瞽亂。素問所謂氣并則無血，故



脈象反盛猶之真藏之脈多屬堅強絕無生意者也知脈理則知治法知治法則知病情矣

大凡產後諸疾虛寒者十之六七瘀滯半之內傷外感又半之而總不外溫補二法常有之候曰惡露不行曰發熱曰尿血曰無乳汁曰頭腦心腹腰脇痛曰嘔逆曰淋瀝曰遺溺曰泄痢曰便秘曰陰腫痛癢曰交骨不合其甚者曰傷寒曰中風曰浮腫曰虛勞凡此數者世俗犯之有終身不愈者至中風虛勞多歸不治由古法久廢下士多愚非必死之症也惡露之候產後下血過少腹滿而脹痛引少腹牽掣腰背宜加味生化湯

生化湯加澤蘭

二錢

延胡

一錢五分

益母草

三錢

甚者逆搶心曾手足厥冷唇乾腹太短氣促喘宜甘草湯

甘草湯甘草芍藥桂心阿膠各

一兩

大黃

一兩三錢

以東

流水三升煮一升內膠令烊分三服見千金方

若敗血不下成塊作痛俗謂之兒枕痛乃血瘦也宜失笑散

方見拯危篇

立效散

立效散五靈脂爲末每服

二錢

溫酒調下

見局方

古鐵酒

古鐵酒古鐵

五錢

火燒令赤以酒三合入燂之溫服

見

千金方

烏賊骨湯治之

烏賊骨湯烏賊骨

三錢

桃仁

二錢

當歸芍藥芍藥阿膠各

一錢五分 肉桂 五分 五靈脂 一錢 作一服

產後發熱其候大熱煩躁晝輕夜重或譫語神昏脈虛大者

虛也宜當歸補血湯方見孕疾篇 腹內痛有塊者瘀也宜生化湯

方見調攝篇 感冒者宜補虛加乾薑湯

補虛湯加乾薑 一錢 作一服 見丹溪心法

四物炮薑湯

四物炮薑湯 芍藥 二錢 乾地黃 三錢 炮薑

二錢 當歸 三錢

若因蒸乳而熱者乳必脹痛去乳汁即愈若往來寒熱者宜

柴胡湯主之

柴胡湯 柴胡 八錢 黃芩 人參 甘草 各一兩 生薑 六錢 大棗

十二枚 半夏 三合 以水三升煮一升五合分三服 見干

### 金方

新產無乳其故有二陽虛陰盛無以化之營血不得溫升故不能生乳體素羸弱者多有之舊說所謂血虛無乳者卽此候也宜益陽以化陰溫經以通絡宣營湯主之

宣營湯當歸黃芪阿膠各 三錢 人參 五錢 芎藭芍藥各 二

錢 川貝母 一錢 炮薑 一錢 紅花甘草各 五分 十味作一服

氣滯血阻脈絡不通乳道壅閉亦無乳宜豬蹄湯

豬蹄湯豬蹄 二枚 通草 二兩 以清酒三升浸之加水一升

煮一升飲之 見千金方達生編無通草加生黃芪 一兩

當歸 五錢 白芷 五錢 名通脈湯

或貝母湯主之

貝母湯貝母 一錢五分 連翹 二錢 當歸川芎藭各 二錢 桔

梗白芷各 一錢 赤芍川續斷各 一錢 紅花 五分

頭痛者血虛也其候痛連巔頂掣引腦項緊急欲死厥陰少陽陽明之脈會於巔絡於額貫於腦驟亡其血脈絡不安故震動而痛宜小補血湯

小補血湯川芎藭 三錢 黨參 一兩 阿膠 五錢 生薑 二錢

卽少挾風邪不可發散宜一奇散主之

一奇散川芎藭當歸各 二錢 荆芥穗 一錢 作一服 見東

醫寶鑑

心腹疼痛多由血瘀氣結挾寒而起宜芎歸理中湯

芎歸理中湯芎藭

一錢五分

當歸黨參白朮各

三錢

炮薑

枳實各

一錢

桃仁

一錢五分

若虛羸而腹痛少氣不得息少腹拘急牽引腰背不能飲食者宜內補當歸建中湯

內補當歸建中湯當歸

一兩三錢

芍藥

一兩六錢

甘草三

錢

生薑

二兩

桂心

六錢

大棗

十八枚

以水三升煮一升分

三服見千金方

腰痛者下焦虛寒血滯不行也宜續斷飲

續斷飲續斷

三錢

當歸阿膠各

二錢

杜仲

三錢

桃仁延胡

各

一錢五分

肉桂

五分

脅痛者肝虛也宜四物乾薑湯

四物乾薑湯當歸乾地黃芍藥各三錢川芎藟乾薑各一

錢五分棗五枚

冬月產後臍下痛者宜羊肉湯

羊肉湯羊肉四兩當歸陳皮各二兩生薑一兩水二升酒

五合煮八合分三服見醫學正傳

嘔逆之候腹脹懣悶食入卽吐此敗血瘀阻胃氣不降也宜抵勝湯

抵勝湯芍藥半夏澤蘭人參陳皮各一錢五分甘草五分

薑七片作一服見醫學正傳

淋瀝遺溺由於下焦虛寒或產理不順妄用謬法損傷府絡宜桑螵蛸散

桑螵蛸散桑螵蛸十五枚鹿茸黃芪各一兩五錢牡蠣人

參赤石脂厚朴各一兩治爲末每服一錢米飲調下見

東醫寶鑑

鹿角霜飲

鹿角霜飲鹿角霜五錢熟地黃八錢黨參黃芪各三錢非

子一錢肉桂一錢兔絲子二錢

損者宜參朮膏

參朮膏人參白朮黃芪各二斤熬膏每服二錢米飲下

見丹溪心法

或參朮飲然宜速治緩則無及矣

參朮飲人參二錢五分白朮二錢黃芪一錢五分陳皮桃



仁茯苓各一錢甘草五分以猪羊脬一個煮湯入藥再煎

去滓作一服。見丹溪心法。

尿血者血隨溺下滲瀝不已甚則溺孔作痛宜竹茹湯。

竹茹湯竹茹六合人參芍藥桔梗芎藭當歸甘草桂心各

三錢熱地黃一兩三錢以水三升煮取一升分三服。見

千金方。

若渴或淋而渴者宜竹葉湯。

竹葉湯竹葉一升生薑半夏各一兩大棗十四枚小麥二

合甘草茯苓人參各三兩麥門冬一兩六錢以水三升煮

竹葉小麥取二升內藥煮取九合分三服。見千金方。

產後泄痢多因脾虛感寒其候雜下五色或赤白膿血日十

數行腹痛困頓宜芍藥湯

芍藥湯芍藥乾地黄各一兩六錢甘草阿膠艾葉當歸各

六錢以水二升煮八合內膠分三服見千金方

甚者桂蜜湯

桂蜜湯桂心甘草各六錢乾薑六錢附子三錢蜜三合當

歸一兩赤石脂三兩以水六升煮一升內蜜煮數沸分三

服日一見千金方

禹餘糧湯

禹餘糧湯禹餘糧五錢白朮乾薑各二錢黨參一兩茯苓

三錢陳皮川芎藜各一錢炙甘草木香各一錢分二服

久不已者宜豆麥飲

豆麥飲大豆微熬小麥蒲黃各三合吳茱萸一合以水三

升煮一升分三服見千金方

泄瀉者宜安中湯

安中湯白朮三錢當歸黨參各二錢炙甘草陳皮砂仁麥

芽各一錢生薑七片大棗五枚

或補中益氣湯

補中益氣湯黃芪一錢人參白朮當歸各五分甘草二分

陳皮升麻各四分柴胡五分薑三片棗三枚作一服見

脾胃論

便秘不通多由津虧之故或誤發其汗陽泄於外胃氣不降

宜澤府湯

澤府湯阿膠當歸各

三錢

桃仁麻仁各

二錢

黨參

二錢

紅

花 五分

降胃湯

降胃湯人參陳皮各

一錢

作一服

陰腫痺痛木鬱下陷也宜溫肝湯

溫肝湯柴胡白芍川芎各

一錢

當歸首烏白朮苡仁各

三

錢 葱白 七枚

外以蛇床子煮湯薰洗之

交骨不合陽氣大虛也宜十全大補湯

十全大補湯人參茯苓白朮各

二錢

乾地黃黃芪當歸各

三錢 白芍川芎各

一錢五分

肉桂

一錢

甘草

五分

或加味芎歸湯

前方見

產後傷寒治法與產前同產前宜安胎產後宜補血小柴胡湯主之

小柴胡湯柴胡三錢黃芩一錢人參半夏各一錢甘草五

分薑三片棗二枚作一服見醫學入門

若因傷寒時疾熱入血室者宜小柴胡加桃仁五靈脂湯

小柴胡湯加桃仁五靈脂各一錢

或柴胡地黃湯

柴胡地黃湯柴胡地黃各三錢人參半夏黃芩各二錢甘

草五分薑三片棗二枚作一服見得效方

熱渴者熟地黃湯

熟地黃湯栝蒌根三錢人參麥門冬各一錢五分熟地黃

一錢 甘草 五分 糯米 百粒 薑 三片

見得效方

人參當歸飲治之

人參當歸飲人參熟地黃當歸白芍藥麥門冬各

一錢 桂

皮 五分

青竹葉

十片

粳米

一合

薑

三片

棗

二枚

見醫學

入門

中風之候舌寒唇急手指振動甚則牙關緊急手足瘳癱背  
項強直一身皆重或痛或癢嘔逆直視角弓反張名曰蓐風  
此因虛風冷濕及勞傷所爲千金方論曰凡產後諸風不得  
用毒藥不得發汗特忌吐利犯之必死蓋陽虛陰憊之候中  
氣未定乙木不得溫升鬱而生風播煽藏府外則風冷襲之  
束其皮腠表氣壅遏激烈愈增內外交煽津液消亡筋脈攣

縮故手足瘳癱牙關緊急項背強直角弓反張諸症作焉較之尋常中風之候其甚十倍治亦如之非可忽畧爲也千金大豆紫湯

大豆紫湯大豆二升清酒三升以鐵鑊猛火炒豆焦令煙出以酒沃之去豆服三合一日盡之見千金方

獨活湯

獨活湯獨活五兩三錢大豆二升舊酒三升以漬獨活再

宿若急用微火煮令減一升另炒大豆焦以此沃之去豆分五服日三夜二見千金方

華陀愈風散

華陀愈風散荆芥炒爲末每服三錢豆淋酒調下見得

效方按豆淋酒卽上大豆紫湯每服一合

海藏防風當歸散

防風當歸散防風當歸芎藭熟地黃各二錢五分作一服

見東醫寶鑑

皆精當可用若中柔風者舉體疼痛自汗出宜獨活當歸湯

獨活當歸湯獨活二兩六錢當歸一兩三錢以酒二升六

合煮取一升三合分四服見千金方

若夏秋宜用浴法

浴法鹽一升六合雞毛一把燒作灰以水三斗三升煮鹽

作湯內雞毛灰浴之見千金方

產後浮腫乃大虛也脾恃中氣以運陰陽中氣者陽氣也產



後亡血陽氣大虛脾無所恃失轉運之正水氣停蓄津液阻  
梗木鬱於左無升達之力金逆於右無下行之路氣位於上  
水位於下肺不降則水上逆肝不升則氣下陷上逆則腫頭  
目下陷則腫肚腹四支者諸陽之本脾之所屬也血亡陽散  
失所依附漁於四末而水濕隨之無所泄越故壅阻而爲腫  
前人論此謂惡血流入四支夫惡血淤滯能爲痿痺而不爲  
浮腫淺小之見無足深辨前人諸方精者絕少宜馭中湯。

馭中湯黃芪人參白朮各

五錢

茯苓當歸各

三錢

炙甘草

一錢 陳皮 一錢

苡仁 一兩

肉桂 一錢

生薑 三錢

大棗 十二

枚  
作一服

小腎氣湯

小腎氣湯熟地黃當歸人參各三錢澤瀉一錢五分白朮

五錢熟附子二錢肉桂一錢茯苓三錢作一服

若因中風而腫者宜大豆酒治之

大豆酒大豆一升以水六升煮取一升半去豆更煎減半

升內白朮二兩六錢附子一兩獨活一兩生薑二兩六錢

添水三升煮二升內好酒一升六合再煎取一升五合分

五服見千金方

產後虛勞名曰蓐勞其候乍起乍臥飲食不化時作嗽咳自

昏頭痛口渴盜汗寒熱往來喘乏自汗少氣驚悸此由攝養

不善內傷七情陽陷陰逆升降倒置藏府交病表裏均虧誤

用寒涼卽死不治宜羊肉湯

羊肉湯

一觔去脂

當歸桂心甘草各

六錢

芎藭

一兩

芍藥

生薑各

一兩三錢

乾地黄

一兩六錢

以水五升先煮羊肉

取二升三合內藥煮取一升分三服

見千金方

猪腎湯

猪腎湯

猪腎一具

去脂四破之香豉

用綿裹

白粳米葱白各

三錢

以水一斗煮取二升任意服之

見千金方

或加

當歸人參各

六錢

見廣濟方

羊肉黃耆湯

羊肉黃耆湯

羊肉十兩

黃耆

一兩

大棗

三十枚

茯苓甘草

當歸桂心麥門冬乾地黄芍藥各

六錢

以水六升煮羊肉

取三升內諸藥共煮六合分三服一日盡

見千金方

鹿肉湯

鹿肉湯鹿肉 一筋五兩 乾地黃甘草芍藥黃芪芍藥麥門

冬茯苓各 六錢 人參當歸生薑各 三錢 半夏 三合 大棗 二

十枚 以水八升煮肉取四升內藥取一升六合分四服

見千金方

當歸芍藥湯消息治之

當歸芍藥湯當歸 一兩二錢 芍藥人參桂心生薑乾地黃

甘草各 三錢 大棗 二十枚 以水二升煮取一升分三服

見千金方

若流汗不止者宜鯉魚湯

鯉魚湯鯉魚 十兩 豉葱各 三合 乾薑桂心各 六錢 以水二

升煮魚取二升內藥煎六合去滓分二服 見千金方  
虛煩者人參湯

人參湯人參當歸麥冬乾地黃桂心各三錢大棗二十枚

粳米三合芍藥一兩三錢淡竹葉一升以水四升先煎竹

葉及米取二升六合內藥煮一升分三服 見千金方

甘竹茹湯

甘竹茹湯甘竹茹三合人參三錢茯苓甘草各六錢黃芩

一兩水二升煮六合分三服 見千金方

兼見大熱者宜知母湯

知母湯知母一兩芍藥黃芩各六錢桂心甘草各三錢水

二升煮八合分三服 見千金方

胃中逆氣者宜薤白湯主之

薤白湯薤白半夏甘草人參知母各

六錢

石膏

一兩六錢

栝蔞根

一兩

麥門冬

一合五勺

以水四升煮取一升三合

分五服

見千金方

若因交合過早勞損下血者宜熟地黃湯

熟地黃湯熟地黃

一錢五分

當歸蟹爪鹿角膠男子褫襠

燒存性

各一錢

伏龍肝

七分

白茯苓芍藥各

五分

桂心甘

草各

二分半

作一服

見醫學正傳

凡此諸候皆常見之疾達其理通其法無有不瘳外此則有  
跌仆損傷一切非常異候皆不具著明其大旨推廣而貫通

之亦可無所窒滯矣

跋

聖賢中庸工夫全講平易近人醫小術耳而理亦不能外是  
編豹人弟向仲遠借讀赴蜀時留在案頭偶閱一過覺天地  
造化之理已了了在人心目理雖至精而愚夫愚婦無不可  
知始嘆近世醫家好讀奇僻皆醉人讒語耳仲遠家學淵源  
抱負不淺乃讀書數十年而無所試祇此偏長薄技見重於  
時亦可哀也然而已足千古矣道光丁酉十月維揚史丙榮

跋

二五網緼妙合而凝誕彌厥月瓜熟蒂落此天地自然之道不必以人事計之者也然姪子之婦調護識別自有法度七情交戰六氣橫攻一有不慎不得不藉藥餌爲補救之術是書陽湖張子所手集曾刻於吳中三松堂潘氏法多經驗世推善本潘子子宜隨侍闕省篋中携有是編鋟之版以廣其傳夫僻壤窮鄉胎教不明藥石誤投號呼莫救者多矣拯閨闈之呻吟杜嬰孩之天枉婦子熙熙咸登仁壽安知非是書之一助也小道云乎哉同治辛未秋八月平江吳大彬跋



跋

產孕集十三篇陽湖張子所箸濟世利人實非淺鮮道光乙  
己家補之叔祖爲之校訂刊於吳門一時風行不脛而走嗣  
燬於兵火同治戊辰重付剞劂

志厚

隨侍十閩篋中携有是

編見之者咸以爲善接踵向索而版存里中猝無以應因復  
爲鋟版以廣流傳并識其緣起於此同治辛未秋八月潘志  
厚謹跋